

## NAQQIUT

### Taarserpaa akissuteqaat 7. oktober 2012-imeersoq (allatami aaqqissuussinikkut allanngortitserisoqarnikuuvoq)

**Nunarput isumaqatigiissummut ilaatinneqariinngippat ILO-mi isumaqatigiissutip 94-ip akuerineqarnissaa siunertaralugu naalagaaffimmumt saaffiginninnissamut Naalakkersuisut peqquneqarnissaannik Inatsisartut aalajangiifigisassaattut siunnersuut.**

(Inatsisartunut ilaasorta, Naaja Nathanielsen, Inuit Ataqatigiit)

#### Akissuteqaat

(Inuussutissarsiornermut Aatsitassanullu Naalakkersuisoq)

#### Siullermeerneqarnera

Nunatta ILO-mi isumaqatigiissummut 94-imut ilaatinneqarnera pillugu apeqqut § 37 naapertorlugu apeqqutini arlaqartuni apeqqutigineqartareerpoq. Apeqqutit taakku kingunerinik Naalakkersuisut assigiinngitsunik misissuipput. Sulisoqarnermut Ministereqarfik ILO-llu Genevemi allattoqarfia pissutsit paasisaqarfiginissaannut akuutinneqarsimasut. Naalakkersuisut isumaat naapertorlugu ILO-mi isumaqatigiissut nr. 94 Nunatsinnut atuutinngilaq.

Sulineramik Inuussutissarsiuqartut Nunat tamalaat akornanni Kattuffiata ILO-p Najoqqutassiaa (ILO-statutten) tassaavoq kattuffiup aaqqissugaanera, anguniagai, atorneqarnera suliassaalu pillugit kattuffiup tunngaviummik isumaqatigiissutaa.

ILO-p najoqqutassiaani artikel 35-mi, nunat ILO-mi ilaasortaasut nunavittaata avataaniittut nunat immikkoortuini, nunap immikkoortuata nunanut allanut tunngasutigut nunap ilaasortaasup akisussaaffeqarfigisaanni ILO-mi isumaqatigiissutip atorneqarnissaanut suleriaatsit malittarisassallu pingaarnerit aalajangersagaapput. ILO-p najoqqutassiaani artikel 35 naapertorlugu Kalaallit Nunaat aamma Savalimmiut nunap immikkoortorivai nunap ilaasortaasup nunavittaata avataaniittut.

Artikel 35, imm. 2-p malitsigisaanik Danmark nunatut ILO-mut ilaasortaasutut ILO-mi isumaqatigiissummik akuersissuteqarnerup kingorna ILO-p nunat tamalaat akornanni suliffittut allaffeqarfiata generaldirektørianut nalunaaruteqartussaavoq. Isumaqatigiissutip akuersissutigineqartup nunap immikkoortuini nunavittaata avataaniittuni qanoq annertutigisumik atorneqarnissaa nalunaarummi allassimassaaq. Danmark eqqarsaatigalgu Kalaallit Nunaat Savalimmiullu pineqarput.

Nalunaarut taamatut ittoq aatsaat danskit naalakkersuisuinit tunniunneqarsinnaavoq pineqartoq Namminersorlutik Oqartussanit akuersissutigineqareerpat aammalu Namminersorlutik Oqartussat sinnerlugit akuerissutigineqarluni. Aamma taamatut ippoq Namminersorlutik Oqartussat pillugit inatsimmi nunanut allanut tunngasut pillugit aalajangersakkat naapertorlugit.

Sanaartornermut pisortanut isumaqatigiissutini sulinermut piumasqaatit pillugit ILO-mi isumaqatigiissummi illuliortiternermik sanaartugassatullu suliassat tamarmik, pisortat aningaasaataannik akilersugaasut, isumaqatigiissuteqarfigisallu namminersortup sulisuinik suliarineqartut pineqarput.

Tamanna pissusiviusutigut isumaqarpoq illuliortiternissamik sanaartornissamillu suliassanik isumaqatigiissutini illuatungeriit ilaat minnerpaamik ataaseq pisortat oqartussaasorippassuk, isumaqatigiissutillu eqqortinnissaanut pisortat aningaasaataannik atuisoqassappat, kiisalu

illuatungeriit aappaata allap suliuisunik sulisoqassappat, isumaqatigiissut atorneqassasoq. Akerlianilli aatsitassarsiornermut suliniutinut suliniutinulluunniit allanut pisortat aningaasaataannik aningaasalersugaanngitsunut atatillugu illuliortiternermut sanaartornissamullu suliassanut isumaqatigiissutini isumaqatigiissut atorneqarneq ajorpoq.

Nunat allamiunut aningaasarsiat pisortatigoortumik minnerpaaffissaat qaffasissut tusaqqaarlugit pilerinarsinnaagaluarput, pissusiviusutigulli tamanna isumaqassaaq sumi inunngorsimaneq naapertorlugu aningaasarsiaqartitsinerup eqquteqqinneranik, sulisartut nunani allamiut kalaallinit sulisinnaasunit aningaasarsiaqarnerunissaat inatsisitigut qulakkeerneqassalluni.

DIS-imut inatsit, aammalu DIS-imi umiarsuarnut nalunaarsugaasunut atugassatut tamanit atorneqartutut isumaqatigiissutit inatsisitigut aalajangersaavigisatut immikkut ittumik aaqqiissutaasumut assersuutaavoq, danskit umiarsuaasa nunani tamalaani pisariaqartitatut unammillersinnaassuseq isumannaarniarlugu akuerineqarsimasoq.

Umiarsuarni inuttaasut najugaqarfivittut nunagisaanni aammalu DIS-imi umiarsuarnut nalunaarsugaasunut tamanit atorneqartutut isumaqatigiissutaasunik naapertuutsitsilluni aningaasarsiani piunasaqaataasut atugaritillugit DIS-imi danskit umiarsuaataat nalunaarsorneqarsimappat umiarsuaatilik nunanit allaneersunik inuttassanik atorfinitsitsisinnaavoq.

Danskit aamma kalaallit isumaqatigiissutaanni aningaasarsiat inissisimaffiinut naleqqiullugit danskit umiarsuaataanni DIS-imik isumaqatigiissummut attuumassuteqartuni inuttaasut nunat allaneersut aningaasarsiaasa inissisimaffiat appasinneruvoq. Nunanit allaneersut inuttaasut najugaqarfivittut nunagisaanni inuuniarnermi aningaasartuutaasut appasinnerunerannik aningaasarsiat assigiinngissutaasa takusassiissutigaat.

Taamatut tunngavigisaqarluni suliniutini angisuuni illuliortiternermik sanaartornernillu suliassat pillugit Naalackersuisut siunnersuutaat tunngaveqarpoq. Kalaallit Nunaanni aammalu nunat allaniit sulisartut najugaqarfivittut nunagisaanni akissarsianut pisissutaasinnaasunut inuuniarnermi aningaasartuutini assigiinngissut pingaaruteqarpoq.

Assersuutigalugu Kinami akileraarutininik akileereerluni qaammammusiat 13.000 kr.-upput, nioqqutissanillu Nunatsinni 36.000 kr.-it sinnitsiarlugit akeqartussaagaluanik pisissutaasinnaallutik. Allatut oqaatigalugu kinamiut sulisartut SIK naapertorlugu aningaasarsiat minnerpaaffissaasa annertoqataannik aningaasarsiaqarunik, SIK-mi isumaqatigiissutit naapertorlugit aningaasarsiaqarluni Kalaallit Nunaanni najugaqarlunilu sulisup pisisinnaasusianut naleqqiullugu nunaminni pingasoriaatingajaannik annertutigisumik pisisinnaassuseqassapput.

Ippassaq ullormut oqaluuserisassani imm. 18-ip oqaluuserinerani Kalaallit Nunaannut tunngatillugu ILO-mi isumaqatigiissummi nr. 94-ip inissisimaffiata nalornissutigineqarnera eqqaavara.

Kalaallit Nunaanni isumaqatigiissut nr. 94-ip atuutsissanerannik Inatsisartut isummersinnaanerit sioqqullugu nalornissuteqarneq tamanna qulaajarneqassaaq.

Taamaattumik Naalackersuisut allannguutissatut siunnersuummik matuminnga saqqummiussaqaassapput:

”ILO-mi isumaqatigiissutini Kalaallit Nunaata ilaalernissaanut, ilanngullugulu ILO-mi isumaqatigiissummi nr. 94-imut, malittarisassianik ingerlattakkanillu danskit naalackersuisuulu siunissami ataatsimoorussamik paaseqatigiinnissaq siunertaralugu Naalackersuisut UPA13-imut nassuiaammik suliaqarnissamik pisussaaffilernissaat pillugu Inatsisartut aalajangiussinissaannut siunnersuut.”